

Ubrzati reforme i pokrenuti proces evroatlantskih integracija



Visoki predstavnik i specijalni predstavnik EU Valentin Inzko danas se u Sarajevu sastao sa ministrom vanjskih poslova Španije, Miguelom Anhelom Moratinosom, i zamjenikom državnog sekretara SAD-a Jamesom Steinbergom.

“Situacija u ovoj zemlji je uznemirujuća i oktobarski izbori predstavljaju priliku da se ovaj trend promijeni”, rekao je Inzko. Zvaničnici EU i SAD-a izrazili su nadu da će predizborna kampanja biti usmjerena na stvaranje boljih uslova za život svih građana, kao i na konkretne mjere kojima bi se osiguralo da BiH krene što brže prema EU i NATO-u.

“Ove konkretne mjere odnose se na ekonomiju i uopšteno na reforme koje će pretvoriti BiH u vjerodostojnog kandidata za članstvo u EU”, rekao je Inzko. “To također znači da se politički lideri trebaju suzdržavati od vještačkog podizanja tenzija”.

U vezi sa pozivima na mirno razdruživanje, zvaničnici EU i SAD-a su se složili sa visokim predstavnikom i specijalnim predstavnikom EU da Dejton ne nudi takvu mogućnost. “Ovakve tvrdnje su neprihvatljive i s njima se mora prestati”, rekao je Inzko, podvukavši da BiH može postati članica EU i NATO-a jedino kao država i ne postoji druga opcija.

Također su razgovarali o ispunjenju ciljeva i uslova koje je

postavio Upravni odbor Vijeća za provedbu mira za zatvaranje OHR-a. Visoki predstavnik i specijalni predstavnik EU Inzko je informirao Steinberga i Moratinosa da se i mali napredak, koji je u posljednje vrijeme ostvaren, dogodio zahvaljujući OHR-u koji je sačinio popis državne imovine koji se sada može koristiti kao osnova za njenu podjelu.

Ministar vanjskih poslova Španije, Miguel Anhel Moratinos, i zamjenik državnog sekretara SAD-a, James Steinberg, nalaze se u posjeti BiH kako bi dali podstreka i ubrzali pomake BiH prema evroatlantskim integracijama.